

Kálag e'só eche Petro Ndibned n kálag

Kálag e'só eche Petro ântenlé, bad bé Krĭsto bóo ânteléé chó. A kálag-tê wê achægé bó aá, “Bad ábe Dyöb ápwédé.” Abén bad bémpāntēd áte á p̄ed e akuu á mbwóg e echē béchágé'áá bán Esia Maino. Nzom echē enkəŋ boŋ átel enén kálag, ebédéé áwéd bad bé Dyöb nlém á abum áyāle metake míme békúdé'áá ne adúbe áde bēnwōŋgē. Awēd-te, abage bó e'lyág bé nlém ábe nkalaŋ ní bwām míme Yesu Krĭstəə mbageé bó. Mmē nkalaŋ ní bwām rġhóbe t̄ŋgēne, kwééd, mpuu ne ep̄e éche Yesuē áp̄eé ámp̄ē. Alūmēd-te bó áte aá bēkwent̄en metake ne e'lyág bé nlém. Anlúméd bó áte aá bēbíi nén bán mímé metake médíi mekágsen ányín nzé adúbe áde bēwánlé ádé adúbe á mbále. Bēbíi-'e nén bán bēkūd nsábe á “Epun éche Yesuē Krĭstəə áp̄eé.” Anlúméd-te bó áte ámp̄ē aá alongé ádá b át̄ŋgéné abé ngáne alongé á bad ábe bēhíde Krĭstəə.

Nkabtéd n kálag

Ndibned n kálag *1.1-2*

Dyöb dóo ábage e'soosoj *1.3-12*

Elébé ábel mekan míme mésáá *1.13-2.10*

Mekan míme bad bé Krĭsto bét̄ŋgéné abel á p̄ondé e metake *2.11-4.19*

Asuded á yäl ne ábele Dyöb néē mod a Krĭsto *5.1-11*

Nsógten *5.12-14*

¹ Mε Petro, mbapεε a nlomag awě Yesu Krīstəə, ntenle nyé bad ábe Dyöb ápwédé, ábe bépánťédé áte bonj bébé beken á mbwóg é Pontus, Galesia, Kapadosia, Esia ne Bitinia. ² A ntíi nímē Dyöb Titée, ammad nyé apwεd. Echē Edəádəη-’ε ébéle nyédé bad ábe básáá. Abelé nê ábel nyêbele mekan níme Yesu Krīstəə álánǵé nyé aá nyébel. Abelé nê, ábel nímē mekií níme mésyógké á awög mébel nyékud alagsen dé mbéb. Nsimé ne nsaη ní Dyöb mbê ne nyé abé ne abé.

Dewóó e’lyóg bé nlém

³ Mekεnag mébê ne Dyöb áde áde Sáá awě awεd Sánǵwéé, Yesu Krīstəə. Apuúdté Yesu Krīstəə. Né-óó dekudé alongé dékōlē. Abel áde ábéle nê, ábágé syánē e’lyóg bé nlém bé alongé áde déemaá’. ⁴ Desine’ káəηne nhən níme Dyöb ákóηnéde ábē bad. Akóηnéde nyé mó ádyöb. Ahed-te méebō’é, méebéb-paá. ⁵ Dyöb ábenlad echē ngum ákəə nyé adúbe áde nyédúbpé mó, káəη né nyékudé e’soosəη. Abê e’soosəη bényīnnēd á epun é asóg. ⁶ Nyédíi nyébê menyīnge ne nê, kénée édíi nén bán nyéékúđ metake nyaa ne nyaa é esóη é pónde. ⁷ Mmē metake mápě ákəg nyé adúbe, álúmed nén bán adúbe áwúú nyé áte ne mbále. Gól ehεle ebéb, bonj ké nê, bébelé béhé chí á dü ásaad chí. Nzé béhεle bébel nê ne gól, né bétáηǵéné áden adúbe dómpe akəg ábel nén áwúu áte áyāle áden adúbe átómé gól. Nzé áden adúbe átómé mekəgsen áte, né Dyöb déken nyé, ábe nyé ehúmé ne edúbé áde Yesuε álúmēdtē bad bé nkōηsé básyāēl yāl. ⁸ Nyédəə mó kénée nyéēnyīnēē mó. Nyédúbpé-’ε mó kénée nyéēnyīnēē mó bōob. Ké bōob-pe nyétómténé

menyiŋge abé nyaa echě mod éhελέέ-se ahób. ⁹ Chóm echě nyékudté áyāle adúbe áde nyédúbpé mó édii e'soóson ábe ábēn e'dáádəŋ békudté.

¹⁰ Bekal bé'dáádəŋ bēnhōb mam á'sō é' pónδέ t̄ŋgene abē e'soóson abē Dyōb débéé nyé née nsimé. Béntōŋ abē e'soóson ahed áte ábel bésōŋten bó. ¹¹ Edáádəŋ éche Kr̄stəá émbē bó áte áláa bó á e'só é' pónδέ ngáne Kr̄stəá átagké ne ehúmé échě ákudté ámbid e pónδέ, boŋ bēmbē béhedé áte. Béhédé'áá áte ábii pónδέ echě nímē mam mébenlédté ne wée mod awē mébenlédté. ¹² Dyōb dénlūmēd abē bekal bé'dáádəŋ áte áá nsón nímē bébeleé méesaá nsón nímē bēn békudté nsyəŋ áhed, boŋ r̄dii nsón níményé. Dyōb dénlōmē bad Edáádəŋ éche Esáá échě ébidé ádyōb. Echē Edáádəŋ chōó émbēl boŋ baahóg bēkalé Nkalaní m̄ Bwām nímē nyéwógéé bōob. Mmēn mam mōó bekal bé'dáádəŋ bēhóbé'áá. Káəŋne ángel édáá nímēn mekan asōŋten.

Mbɛltéd nímēn r̄sāŋ

¹³ Né-óó, nyépūd abad, nyébē mboŋsēn ábel nsón nímē Dyōb áhedéé. Nyétéd pónδέ nyésum-me nlém r̄syāəl áyāl e nsimé nímē Dyōb débéé nyé á pónδέ echě Yesue ápéé ámpē alúmed-te nyé yāl. ¹⁴ Ngáne édii bán nyédii bad ábe bébele mekan nímē Dyōb áhedéé, nyéēm wāg-se mam mé mbéb nímē nyébélé'áá bōód mébé mékamlán ádēn alongé. ¹⁵ Dyōb ádé apwedé nyé asáá. Né-óó nyémpē nyétəŋgéné asāŋ á mbɛltéd nímēn r̄syāəl. ¹⁶ Eténlédé á kálag e Dyōb nēn bán, “Mbɛltéd nímēn r̄sāŋ áyāle mbɛltéd nímēm r̄sáá.”

17 Dyöb ákáadte' moosyáál nyaa póg. Eékwognáádté modmod. Nzé nyékáne-'ε áwē, nyéchage mó bán Titée. Né-óó, nyéwōη mbwóg ní Dyöb áte á alongé ádēn ásyāāl á nkōηsé-te wén wée nyédíí beken. 18 Nyébíí nēn bán Dyöb ákódté nyé á ekúkú é abé-te. Ekúkú é abé échē ábēn betaa bēnlyāgnēdtē nyé saké chōm nēe gōl ké'ε sílva échē ébébe' chōo ānkōdnédté nyé. 19 Ndāle e mekií échē Yesu Krístā chōo ānkōdnédté nyé. Krístā awē adé nēe ndyōη mí mbód nímé méēwōo awusé ké ahóg á yāl. 20 Nkōηsé níđēhób bán níbootad, Dyöb dēmmād mó apwēd. Boη bōob á asóg hén alúmté yāl wée bad bé nkōηsé. Abelé nē áyāle nyé. 21 Krístā akāó nyédúbpé Dyöb. Nyéhele-se nyédúbé Dyöb nyésūm-me nlém nīsyāāl áwē, áyāle apuúdté Krístā abídté-'ε échē ehúmé áwēd.

22 Abel áde nyébeléé mekan mé mbāle ábélé nyésáá. Nē ábélé-'ε nyāābe bad bémpēe ábe bédúbpé Yesuε nyédāηné. Né-óó nyédāη nhóg ne aníníí ne nlém nīsyāāl. 23 Nyébíí nēn bán Dyöb ábágé nyé alongé dékōōlē mbwiined ne échē eyale. Echē eyale épééne alongé éesaá-'aa chōm éche ébébe'. Ebē abé ne abé. Dyöb áde ádé á ngíndé ne á ngíndé dōo ábágé nyé áđē alongé saké moonyoη. 24 Eténlédé á kálag e Dyöb nēn bán,

“Moonyoη adíí nēe nkāókāo,
 ábē e'boη-'ε é'dé nēηgāne mbonja échē
 ékwoge á ahín-tē.

Nkāókāo ayēnle', mbonja-'ε ésoode.

25 Boη eyale é Dyöb ébé abé ne abé.”

Echē eyale édíí nkalaη mí bwām níme békánlé nyé.

2

Nyèdii meláá mé alongé

¹ Né-ɔ́, nyéede míṁēn mbeltéd mé mbéb ísyā́l. Nyéekālē metóm, nyéelúmté' á díd-te ngēn nēn bán nyēbele bwám áde nyēebeléé, mod eesíídé waáb, e'yale bé mbéb béēbídē-’ε nyé á nsal. ² Nyētánḡéné awan áte ákud ndyééd e edáádəŋ echě esáá, melemlen ngáne bán bé nkáál béchyεε’ε abíi, ábel nēn nzé nyēdyédé ene ndyééd, nyékwog ákud e’soóson. ³ Nyēwógléné ene ndyééd, nyēbíi-’ε bɔɔb ngáne Sánḡwéé ábeléé mekan mé bwám. ⁴ Nyéhyag wéε Sánḡwéé, mó adé néε aláá dé alongé áde belón bé ndáb bēnchenéé, bon Dyōb ányín dó aá ákwógnédé, ápwēd, ákōō-’ε dó. ⁵ Nyéhyag-kɔ́ nyébē néε meláá mé alongé míme Dyōb ábenladté álón eche ndáb e edáádəŋ. Awēd-te-’aá nyēbenléé mó. Nyéēbē beprise ábe bésáá, nyébagé mó mendε mé edáádəŋ míme mékóbnédé áwe e’só mbwiined ne Yesu Krístə. ⁶ Eténlédé á kálag e Dyōb nēn bán,

“Ntédé aláá dé etógnén
nsumé á Zayɔn.

Kénzéé awē adúbpe mó éekwágké.”

⁷ Adén aláá-ɔ́ adé etógnén ne nyé awē nyédúbpe mó bon ne bad ábe béédúbpe mó ádíi nēngáne
“Aláá áde belón bé ndáb bémbāḡgē abenled,
dóó átímé aláá dé etógnén abé.”

⁸ Eténlédé ámpē nēn bán,

“Mó adé aláá áde bad bélúmeé ámīn

abé-’ε ndim e aláá echě ebele bad békweg.

Bad békweg áyāle béēwōgnēē Dyōb. Nē dóó Dyōb átíídé aá ébenled ne bó.”

⁹ Boη nyé, nyéēsaá nê. Nyêdii bad ábe Dyöb ápwédé, beprise bé Dyöb ádé ádé kâη. Nyêdii alon áde ásaá, Dyöb dên-naá áwóó nyé ábel nén nyélúmed bad bémpēe ngáne ápédé bwám abé. Dyöb áhúdé nyé á ehíntén-tê, apεené nyé á e'nyinen bé ekíde. ¹⁰ Ngen e'só nyénkêmbáá bad boη bəəb nyéēnyêdé bad bé Dyöb. Ngen e'só ngəl e Dyöb enkêmpaá áwēn boη bəəb Dyöb áwógé nyé ngəl.

Nyébê betāη bé Dyöb

¹¹ A-bānned nhede meé nyésōηten nén bán nyêdii beken, nyêtome-'ε á nkōηsé wén tómén. Né-óó nyéēbanné nlém ne mekan mé ekob é yəl áyāle nén nê áwanne ábēn e'dəəđəη bēn nzum.

¹² Nyéwále alongé á bwám átínté e bad ábe béedúbpe Dyöb, ábel boη ké bēnhōb bán nyêdii bad bé mbéb, bényin mímēn mbeltéd ní bwám. Nê dékăη bébe Dyöb edúbé mbwε míme Dyöb dépéé á epun é asóg.

¹³ A dīn á Sāηgú, nyéwógne bad bé nkōηsé ábe bédé á nkamlēn, ken nkamlēne ambáámbáa, ¹⁴ ké'ε kâη échě édé ásē e nkamlēne ambáámbáa, echě álómé ákógsen bebel bé mbéb ne ákémed bad ábe bébele' bwám. ¹⁵ Dyöb áhede nén aá mekan mé bwám mímě nyébeleé mékúdtēn mehób míme ábê e'yókél é' bad bēhóbéé nyé áyāl, míme béébii'é. ¹⁶ Nyéēsaá betāη, nyêdii kunze. Boη pēn nê déebageé nyé nzəm ábel mbéb. Nyébê née bembəledε bé Dyöb. ¹⁷ Nyébage moosyāál edúbé. Nyédəη-'ε bad bémpēe ábe bómpē bédúbpé Krīstəə. Nyébáa Dyöb. Nyébage kâη Embáámbáa edúbé.

Metake nime Krīstəə mēbê syānē e'chemléd

¹⁸ Nyé bad ábe nyêdé bembəledε, nyésuded yǎl ásē e bad ábe nyéβenleé ne edúbé ésyāāl. Nê déēbāg ne ábe bēbóó nlém bēnpen, boŋ nê ábê ne káāŋne ábe bēbēbé nlém. ¹⁹ Dyöb débē menyiŋge ne nyé nzé nyēweséné e'wε é' metake nime nyénkēmbáá nyékude áyāl echê. ²⁰ Nzé ebelé mbéb, boŋ ewēséné mbéte áyāle nímê mbéb, ne nsyāŋ níhée wékudté? Boŋ nzé ewēséné metake ké áyāle dyam á bwám áde ébélé, né Dyöb débē menyiŋge ne wε. ²¹ Mmēn metake mēbóŋnéde nyé awé Dyöb ápwédé, áyāle nén Krīstəə mwēn antāg á nló nímēn. Anlyáge-'ε nyé elanśén ábel nyéhíd nímē mekuu. ²² Enkēmbenlé mbéb ké nhóg, modmod enkēnwóg-kaá mó eyale é mbéb á nsəl. ²³ Ade bad bésyáá mó, enkēntimténné bó. Ade bétágté'áá mó, enkēnsidté bó. Boŋ ambě mésyāāl á mekáá mé Dyöb áde ákáadte bad bésyāāl nyaa póg. ²⁴ Krīstəə mwēn ampém nímēd mbéb áwe yǎl á awog ábel nén deewóó dyamdiam ábel ne mbéb, débεle-'ε mekan nime Dyöb áhεdεé, á alongé ádēd. Echē sii ébélé nyékudé e'choóchoŋ. ²⁵ Nyēmbé née nídyoŋ ní mbód nime níbóó boŋ bəəb Dyöb ápééné nyé ámbíd áhíd mod awé anone nyé ngáne nnən-a-mbód ánənεé éche mbód.

3

Bebaád ne ábab bechóm

¹ Nyé bebaád bé bechóm-mε nyéwógne áben bechóm ábel boŋ ké émbē nén bán béēhídεε eyale é Dyöb, nímēn mbeltéd ní bwám níbel bómpē bétimned Dyöb, bédúbé-'ε mó. Ké nyéētogne bó dyamdiam aláa, ² bényĩn áden abé á bwám áde

ásáá. ³ Nyéēsūmē nlém nén bán ábēn e'boŋ é'bide dásō áyāle ekāŋ é mbíd ebwóg née anabe dé esid, ahé á bwēm nēŋgāne e'bōŋ, nsāŋ, ne e'bése ké'ε kase é mbóté. ⁴ Boŋ bébii nyé dásō ne e'boŋ ábe é'bide nyé áte. Abê e'boŋ béehəŋlānné áyāle é'bide ne edāádəŋ éhə épwíítédé éhə éetagtán-
ne. Abê e'boŋ bóō Dyöb ányíneé aá é'dé etógnén. ⁵ Nê dōō bebaád ábe bésáá bé' bóōd ábe bənsūm nlém ne Dyöb bébélé'áá boŋ é'bāb e'boŋ é'bíd áwed. Bəwógné'áá ábab bechóm. ⁶ Seraa mwēn ambé nê. Awógné'áá Abrahamε áchəgé-'ε mó aá asāŋ. Nzé nyébele' mam mé bwām ésebán nyébáa dyamdyam, né nyédii Seraa ábe bán. ⁷ Nyé baachóm-mε ábe nyéwóó bebaád, nyétəŋgéné ábēn bebaád edúbé abε. Mod téé ábê ne awé mwaád, ánəne mó bwām. Béepedεé nyé e'wúu áte, boŋ nyáábōō nyééküď alongé nyaa póg. Adê alongé ádii nsimé míme Dyöb ábagεé. Nzé nyéewānle bó ŋgāne éhədneé, né Dyöb déewóŋké nyé mekáne.

Nyébele bwām ké nyékudé metake

⁸ Asóged, nyé moosyáál nyébê mod nhóg, nyéwōŋ nlém míme mípwíítédé, nyésudεd-tε yǎl. ⁹ Nyéētímté mbéb áyāle mbéb. Nzé mod ahóbé nyé dyam dé mbéb áyāl, nyémpē nyéehóbé mó dyam dé mbéb á yǎl, nyékáné kánnén bán Dyöb ánamed mó, áyāle nnam mōō Dyöb dénhōbpē aá mōōbε nyé áde ámpwεdté nyé. ¹⁰ Eténlédé nén bán,
“Kénzéeé awe ahεde alongé dé menyŋge,
áhεdé-'ε aá mónyín e'pun é' bín é' bwām,
eehóbé' mekan mé mbéb,
eékālē-'ε metóm.
¹¹ Asóg mbéb abεl, ábele mekan mé bwām.

Awanɛn ábɛ nsan ne moosyáál.

12 Ayále Dyöb anóné bad ábe bébele mekan mé bwám
awoge-’ε bó mekáne.

Boŋ akunnan bad yäl ábǎ bébele mbéb.”

13 Nzéé-̄ ahele ádɛŋ nyé mbéb abel nzé nyéwóó nlem áte ábel mekan mé bwám? 14 Boŋ ké nyéntäg-ke ké tagén ábel mekan míme Dyöb áhedéé, né Dyöb dé naméd nyé. Nyéewógé mbwóg, nyéētägē-’ε áte. 15 Boŋ pɛn nyébe Krístæ edúbé, nén móódé Sánwéé á alongé ádɛn. Nyébê mboŋsɛn pón dé ésyāál átímtɛn kénzée awě asédté nyé dyam tɛŋɛne nlem míme nyésümē wée Krístæ.

16 Nyékéled nlem á abum. Nzé nyébele nê, nyésüdéd yäl ne edúbé ésyāál, nyékéléd-te nlem á abum wée bad ábe béhóbe nyé mekan me mbéb áyāl, áyále nyéhídeé Krístæ. Békwaŋ nzé bényíne ádɛn abé á bwám. 17 Nyébii nén bán édé bwám mod ákud metake áyále dyam á bwám áde ábélé, nzé nê ádé á ntii ní Dyöb, tómaa ákud metake áyále dyam dé mbéb. 18 Krístæ mómpē anküd metake awé-’ε áyále mímed mbéb ngen póg ne ngen ésyāál. Abédéε mod awě abele mekan míme Dyöb áhedéé, boŋ anwé á nló míme bebel bé mbéb. Ambel nê, ábel dépe wée Dyöb. Bad bɛnwū mó boŋ éché ekob é yäl chóó énwē. Dyöb dɛmbǎl éché edáádɛŋ émbē ébē á alongé. 19 Eché edáádɛŋ chó-’aá ánkéénné á mbwóg áke dé akale e’dáádɛŋ eyale é Dyöb. 20 Abén e’dáádɛŋ é’bédéε e’dáádɛŋ ábe bɛnkɛnwógɛn Dyöb se’ bóód áde Dyöb dɛnchabtédté bó e’kád áte ábel bétede mítab mbéb á pón dé eché Noa álóó’áá bǎle é’mbáá. Bad waam bɛnpɛn bóó bémbē á bǎle-té. Bɛnküd e’sóosɛŋ

áyāle mendíb. ²¹ Nén ádé melemlem nêṅgáne edusen. Echê edusen chóó ébele bəəb boṅ bad békūd e'soósoṅ á ngíne e mpuu níme Yesu Krístəə. Edusen éesaá awobe á yǎl áhúd mbinde boṅ édii ákwentən dé abele Dyöb ne nlém níme ísáá. ²² Krístəə akií ádyöb, áwed-taá ádyéé Dyöb á ekáá é mbáá boṅ ákamláán ángel ésyāəl, benkamlenε ne ngíne échě édé ámín.

4

Aloṅgé á bad ábe bédúbpé ábê ngáne Dyöb áhedéé

¹ Né-óó ngáne édii bán Krístəə ankūd metake é ekob é yǎl, nyémpē nyétəṅgéné nyébé mboṅsén áwón melemlem mé mewēmtən nêṅgáne ánwōṅgē. Ayāle, kénzée awě atagé é ekob é yǎl, asogé mbéb abel. ² Ngáne édii-'aá nê, aloṅgé ádēn á nkōṅsé wén ábê ngáne Dyöb áhedéé saké bán mpúlé mé nkōṅsé múmó nkamlan nyé. ³ Mekan míme bad ábe béebíi Dyöb bédəə'é abel móó nyémpē nyébelé'áá. Ene pónde emaa atóm, ekwōgnédé-'ε. Nyékábé'áá mesón, nyéwón nlém áte ábel mam mé mbéb, nyémwágé'áá mím mékōbē nyé, nyéchagé'áá ngande échě bad bémwágé'áá mím mékōbē bós, bébelé-'ε e'tongé é' mekan, nyé benlé-'ε myöb mémpēe, dyam áde déeboó. ⁴ Bēn ábe nyáābōó nyébeláá nímén mbeltéd mé mbéb bōód, bédé menyáké bəəb ányín nyéesaá ne bós ámpē ábel epuutéd ne e'kúkú é' mekan. Né-'aá ákáá boṅ bésyāəl nyé. ⁵ Boṅ bétýēem á nkáá á'sō é' Dyöb áde ábōṅséné ákáad moosyāəl. Akāād ábe bédé áloṅgé ne ábe bēwédé. ⁶ Nén dóó

dékəŋ boŋ nkalaŋ ní bwâm níkanléd káəŋ ne wée bad ábe béwédé, ábel boŋ kénéé bénkādtē bó áde bédíí á nkōŋsé-te, béwé-'ε ngáne moosyāál áwágkē, béhele-se bēbé á alongé ngáne Dyōb ádíí.

Nyēbenlad nde éche Dyōb ábágé nyé bwâm

⁷ Asóg dé mekan mésyāál ádé benben. Né-óó nyébwəg yāl nyétéd-te pónde ábel nēn nyéhel akáne. ⁸ Amín e nímén mésyāál, nyédəŋ nhóg ne aníníí ne nlém rísyāál. Nyédəŋ nhóg ne aníníí, áyāle edəŋge ékúdtan mbéb híin. ⁹ Nyékob nhóg ne aníníí nken ésebán nyényonŋe áte. ¹⁰ Dyōb áwóó nde híin, abagé-'ε mod téé echē nde. Nyébê bembəlede bé bwâm nyēbenlad-te échēn nde áwōŋgen nhóg ne aníníí. ¹¹ Ane awē abíé' dyaŋ ahób, ahóbé dó nēe nhóg awē akale' e'yale ábē é'bidé wée Dyōb dēn. Ké nzéé-'ε awē awōŋgan baáb, ábele' nē ne ngíne esyāál echē Dyōb ábágé mó. Nē débidēd ehúmé é Dyōb áwed á yāl e mekan mésyāál mbwiined ne Yesu Krístəə. Ehúmé ne ngíne esyāál bēbágnédé mó á ngíndé ne á ngíndé. Ebê nê.

Metake nímē bad bé Krísto békudé

¹² A-baányəŋ, nyéebág menyáké ne mekəgsen mé ngíne nímé mépiide nyé bəəb. Nēn déebág nyé nken. ¹³ Nyébê menyinŋe pən nēn, nyékude' metake melemlem ngáne Krístəə ákúde'áá, ábel nēn nyélōn ne menyinŋe á pónde echē Dyōb délūmēdtē ehúmé éche Krístəə. ¹⁴ Nzé bad bésyāə nyé áyāle nyédíí bad ábe bēhíde Krístəə, né yāl eboó nyé áte, áyāle ehúmé é Edəədəŋ é Dyōb édé ne nyé. ¹⁵ Boŋ pən nzé nyékude metake éebāg nēn bán nyékude nímē metake áyāle nyéwúú

bad, ké'ε áyāle nyéchíbé, ké'ε áyāle nyédíí bad bé ebébtéd, ké'ε áyāle nyésóléé mam mé bad áte níme méenóné nyé. ¹⁶ Ké né-'ε, nzé nyékudé metake áyāle nyédíí bad ábe béhíde Krístəə, nê déekwāgtē nyé. Nyéságnen Dyöb ságnén nén bán béchágé nyé bán bad bé Krísto. ¹⁷ Ayāle póndé edé echě Dyöb débootédte bad akáad, äbootéd-te ne ábē bad. Nzé Dyöb áhεle ábootéd-te ne syánē awě dedé bad bé Krísto, chán-nō ébēennē bad ábe béebelé' mam ngáne nkalanj mí bwām rí Dyöb níhεdεé. ¹⁸ Eténlédé-'ε á kálag e Dyöb nén bán, “Nzé éhεle élenléd kááηne mod awě abεle ngáne Dyöb áhεdεé áte ákud e'soóson, né chán-nō ébēennē bebel bé mbéb ne bad ábe béedúbpe Dyöb?”

¹⁹ Né-óó, bad ábe bétage' ngáne Dyöb átíídé, bébê bébele mekan mé bwām, bébe-'ε yāl á mekáá mé Dyöb áde áhágé bó, mó awě ábele kéchéé échě áhábé.

5

Petro alébe bad ábe bélyágte mwembé

¹ Με νέε nhóg awě alyágte', ndəá meé níbe bad ábe bélyágte' átíntē echên elébé. Ndé nhóg awě ambé metake níme Yesuε ásē. Ehúmé échě Dyöb débεé Krístəə épě awēm ámpē. Nlébe' nyé nén meé, ² nyénone bad ábe Dyöb ábánné ásē echên melemlem nêngáne nnən-a-mbód ánənεé éche mbód. Nyénone bó áyāle nyédáá bó anən. Nyéenōnē bó byánán bényágté nyé ânən bó. Nyébele' mímé nsón saké é etútú é nsyááη, boη ébê bán nyēwóó nlém ábel mó. ³ Nyéēkamlán bad ábe bédé ásē echên ne ngíne. Nyébê bad ábe béhídtē mekuu mímbāb.

⁴ Ade kâη e benən-bé-mbód épεέ, äbĕ nyé nsábe míme ríchábé ámīn. Mmê nsábe mébē á ngíndé ne á ngíndé.

⁵ Nyémpē ábe nyêdé ásē e bad ábe bélyágte', nyésuded yǎl, nyésuded-tε yǎl nzé nyêwôηgan nhóg ne aníníí. Ayāle éténlédé á kálag e Dyöb nén bán Dyöb ákunnan bad ábe bédé kúmbe yǎl, bon abage bad ábe bésúdté yǎl nsimé. ⁶Né-ᵛó nyésudεd yǎl ásē e ngíne e Dyöb ábel bon mwēn ácháged nyé á póndé echĕ eböηnédeé mǎ. ⁷ Nyéchene mekan mésyāal míme métagte nyé áwe mekáá, áyāle atédé mam míme métagte' nyé née mímē.

⁸ Nyékôb yǎl, nyétêd-tε póndé. Mod a ekoyí awêñ, Satanε, ahôηge née ngii echĕ edume áte, ahεde mod awĕ ányabεé áte. ⁹ Nyéēmwāg-sε atóm nyé áte. Adεn adúbe déesudé'. Nyêbíí nén bán bad bémpēe ábe bédúbpé née nyé nkôηsé áte rísyāal bómpē békude metake mímĕ nyémpē nyékudεé. ¹⁰ Nyékude' metake bon mímē metake méechabpé áte. Ambīd e nê, Dyöb áde ábage' nsimé rísyāal dēn débĕ nyé kéchéé éche nyébódé. Ábel nyésūmēñ, awéd-tε nyé áte. Adíí Dyöb áde nsimé mímē ríkwógnédé moosyāal, míbê-'ε póndé ésyāal. Mǎ apwεdé nyé ákud éche ehúmé échĕ ébē á ngíndé ne á ngíndé. Nyéĕkūd-tε chǎ áyāle nyêdé ne Krístæ. ¹¹ Ngíne esyāal edíí echĕ á ngíndé ne á ngíndé. Ebĕ nε.

Melenten mé asóg

¹² Sailasε mǎ awóηgénε με átel anén mwǎ kálag. Adíí με née mwāñned mbāñné-'ε mǎ nlém á yǎl. Ntenle nyé enén kálag áwéd nyé nlém á abum, áláa-'ε nyé nén meé mímén mam míme ríténlé nyé

médíi nsimé ní Dyöb ní mbále. Nyéehúdé mekuu áhed. ¹³Baányonj bé mwembé ní Babilón ábe Dyöb ápwédé née nyé, bélómmé nyé melentɛn. Awem mwǎn awě níkwógté á adúbe-tê, Makose mómpē alómmé nyé melentɛn. ¹⁴Nyéhê nhóg ne aníníí tâl álúmed edəŋge. Nsaŋ níbê ne nyé bad bé Křisto bésyāāl.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48